

四庫全書

史部

欽定四庫全書

山西通志卷一百九十一

藝文十 碑碣一

漢

郭有道先生墓碑

蔡邕

先生諱泰字林宗太原介休人也其先出自有周王季之穆有虢叔者實有懿德文王咨焉建國命氏或謂之郭即其後也先生誕應天衷聰睿明哲孝友溫恭仁篤

慈惠夫其器量弘深咨度廣大浩浩焉汪汪焉奧乎不可測已若乃砥節礪行直道正辭貞固足以幹事隱括足以矯時遂考覽六經探綜圖緯周流華夏隨集帝學收文武之將墜拯微言之未絕於時纓緜之徒紳珮之士望形表而影附聆嘉聲而響和者猶百川之歸巨海鱗介之宗龜龍也爾乃潛德衡門收朋勤誨童蒙賴焉用祛其蔽州郡聞德虛已備禮莫之能致羣公休之遂辟司徒掾又舉有道皆以疾辭將蹈鴻崖之遐跡紹巢

許之絕軌翔區外以舒翼超天衢以高峙稟命不融享年四十有二以建寧二年正月乙亥卒凡我四方同好之人永懷哀悼靡所寘忘乃相與推先生之德以謀不朽之事僉以爲先民旣沒而德音猶存者賴之於見述也今其如何而闕斯禮於是樹碑表墓昭銘景行俾芳烈奮於百世令聞顯於無窮其辭曰於休先生明德通玄純懿淑靈受之自天崇壯幽浚如山如淵禮樂是悅詩書是敦匪惟撫華乃尋厥根宮牆重仞允得其門懿

乎其純確乎其操洋洋縉紳言觀其高棲遲泌丘善誘
能教赫赫三事幾行其招委辭召貢保此清妙降年不
永民斯悲悼爰勒茲銘摘其光曜嗟爾來世是則是效
北周

周大將軍聞喜公柳遐墓誌

庾信

君諱遐字子昇河東解縣人也秦始征晉之地漢開平
越之鄉律中夷則星居鶉首况復莊謀於衛既為社稷
之臣喜對於齊無廢諸侯之職祖叔珍宋員外散騎常

侍義陽內使有徐邈之應對居於散騎之省有汲黯之
正直理於淮陽之郡父季遠臨川王諮議參軍宜都太
守蘭臺石室是所洽聞白馬飛狐逾高詞氣西都吳融
擅名江表言談相會宛如舊焉君膺令德之靈稟沖和
之氣齟齬髻髮夙智早成愛敬自天虔恭得性含仁抱
義履信居貞世父儀同忠惠公特加器異乃謂公曰吾
昔逮事伯父太尉公見語云我昨夢汝登一高樓樓盡
峻麗吾以坐席乞汝汝或富貴恨吾不及見耳吾向聊

復晝寢又夢將昔時坐席還復賜汝汝位官當復見及
王祥佩刀世為卿族鮑永驄馬家傳司隸以此連類差
無慙德輕車西昌侯作藩襄漢君時年十二以民禮修
謁進止端詳神情雅正侯目送之不輟試遣左右踐君
衣裾欲視舉動君徐步稍前曾無顧盼魏侯之見劉廙
不覺斂容漢主之觀田鳳遂令題柱比之今日曾何足
云騾騎廬江王帝子出藩懸衡高選以君華望召為主
簿張坦直諫既稱荀令之香鄒湛知言彌見羊公之德

諮議府君於都薨背君奔赴六日即屆京師形骸毀瘁
不復可識靈柩沂江中川薄晚亂流乘選迴風反帆舟
中之人相視失色抱棺號慟誓不求生俄爾之間風波
卽靜咸以君精誠所致成都孝子自赴江流桂陽先賢
身障野火並存靈柩咸可傷嗟太夫人乳間發瘡醫云
惟得人吮膿血或望可差君方寸已亂應聲卽吮旬日
之間遂得痊復君之事親可謂至矣從兄右衛擁旌嶺
表苦相攜致昔馬遊志氣爲馬援所知班嗣才學爲班

彪見賞復聞於今日矣乃除永化縣令靜尋鼓案或吟
長岑之遠乍撫鳴琴不以河陽爲陋日南金柱合浦珠
泉莫肯經懷未嘗畱目解巾平西邵陵王法曹參軍仍
轉尚書工部侍郎始入禮闈既登蘭閣尚書僕射陳郡
謝舉人望國華引君言論謂同位坐曰江漢英靈見於
此矣西中郎岳陽王以綠車之重臨西河之牧敕用君
為本州治中尋遷別駕王叔理以品物流名陳仲舉以
題軒馳譽君之展驥兼而有之及乎大盜移國王室騷

然月動星搖雲平虹直岳陽王承制陝左當壁漢南天
網所頓英賢畢集授君散騎侍郎吏部員外郎散騎常
侍兼太子侍講監儲甲觀事重史丹侍講桂宮名高張
禹俄遷車騎大將軍侍中開府儀同三司餘如故方之
驂乘霍去病爲侍中譬彼將兵公孫敖爲驃騎足以照
曜六府謨明九德豈直允諧上將匡贊中軍而已哉旣
而言從梁國服政鄴都管仲有詞卽受下卿之禮臧孫
見德還奉嘉賓之宴有詔授使持節驃騎大將軍開府

儀同三司霍州諸軍事霍州刺史犀節去關袞衣馳傳
迎郊則文學前驅賓衛則邦君負弩直以五溪遼遠馬
伏波之思歸三湘界濕賈長沙之不願是以宜城刺史
直會鹿門白沙故地仍畱龍種天厲弗戒奄然終極天
和某年歸窆於襄陽白沙之舊塋君器宇詳正風鑒宏
敏澡身浴德游藝依仁汝南令望扶風長者不言財利
王夷甫之爲德不談人物阮嗣宗之為人從容亂離之
機保此令德舒卷風雲之際無妨貴仕張衡渾儀之後

即賦歸田杜預沈碑已來遂停鄉里王仲宣有讀書之
樓諸葛亮有彈琴之宅實欲因此謝病閒居終焉嗚琴
在膝或對故人寶劍自隨時遇稚子百年俄頃嗚呼哀
哉遂使君子之陵止埋銅劍賢臣之墓唯銘石函銘曰
有莊有惠居魯居衛義是隨時才堪濟世北部尚書東
京司隸必復其始侯君相繼華蓋一岳文昌一星青衿
辯志童子離經義勗非典書勤映螢往年靈樞漂泊江
淹以君哀慟川石停波揚名北海馳譽西河誰登九折

不入朝歌蔚炳胥變攀陪遂遠白鹿隨軒丹輦附冕位
參上將榮兼本選蛇盤綬結龜迴印轉來朝平樂歸政
咸陽蕃維卽啓軍幕仍張起茲禮數峻此戎章長離宛
宛刷羽陵江世急奔流年催驚隼滅沒頓轡扶桑搖軫
智士石圻賢人星殞西鄂芝枯南陽菊盡愴焉啓首生
榮終極相杵輟春鳴機罷織莞莞眉子視陰餘息霜露
履之哀哉欒棘龍巢北望鳳闕前觀松長風遠地厚泉
寒書埋簡落琴覆絃寬贈行之冊書而納棺

唐

唐并州都督鄂國公尉遲恭墓碑 許敬宗

蓋聞嶽靈昭貺協其神者申甫緯象騰弒含其精者伊
傅用調芳玉鉉增耀金符譬八柱之承天猶四溟之載
地是以邠郊創厯冥契非虧之兆沛野開基鬱會攀鱗
之傑莫不凝徽簡策篆勲戈鼎比裂河而濟美期礪嶽
以疇庸若乃經啓睿圖彌綸聖業扈兵師於丹水夷餌
石之祆渠振文策於烏江掃拔山之巨稜抑揚七佐鎔

鑄五臣致我后於勛華軼前修於樊灌名高絕代其在
忠武公乎公諱恭字敬德河南洛人也原夫玉派靈長
控昌源於弱水瓊基峻遠峙層構於軒臺叶粹氣以擒
賊威橫朔野奄崆峒而擅武跡跨中原亦猶江馬南浮
圖基巨麗溟鯤北運激勢扶搖是故軒冕傳華半神州
而交蔚忠良秀美繹帝里而馳芳與夫由余去危斥剪
敦而作霸日磔受顧光珥貂而累華考諸聲實固不同
年而語也曾祖本貞後魏中郎將冠軍將軍漁陽郡開

國公贈中外六州諸軍事謚曰懋道粹黃中竒侔丹化
襲徽章於珪瑞飛茂績於鐘鏞大父益都北齊左兵郎
中遷金紫光祿大夫入周濟州諸軍事濟州刺史雕鏤
杞梓黼藻人倫用匪齊鈞亟深微管之寄價符趙璧愈
擅入秦之美考伽隋授儀同三司衛王記室皇朝追封
常寧安公贈汾州刺史幽州都督材緯三端揚鑲武庫
位階一命頓轡文房下調悲於季葉節壤昭於昌運故
知壯氣猶生貫千秋其尚想名臣不作瞻九原而增悼

再緝部符之贈式冠封墳之典公鄧林抽穎崑嶠疏源
非假七齡早鬱凌霜之幹爰滋九潤先孕聯雲之寶瞻
言廣術企列戟於髻初屬相傾義俯迴戈於度內雄姿
岐嶷覆篲裁規沈勇潛貞涌泉韞量飾躬由禮檢性依
仁匪衛祓於齊挑函翹誠於孟荀言泉河瀉應千里而
無違俠氣颺騰輕百金而有裕加以鈐符元秘劔術精
微偃月疏營右澤左陵之勢浮雲鴈陣鵝張鶴列之奇
莫不夙契靈臺暗窮神奧由是譽光日下聲蓋秦中而

翠虬驤霧必先階於尺木紫鷲追風初發蹤於步武爰
膺執戟之選以効棄觚之節蒙授元帥都督拜朝散大
夫轉議正大夫加銀青光祿大夫大業十二年也未展
雄飛載羈下列何意乎九苞呈瑞儷彩司晨一角効祥
儔蹤警夜俄而連鍾旒冕政弛永衣疑大浸襄陵長虹
貫日公迺行吟梁父希管晏以思齊屈跡淮陰候蕭張
而佐命皇家輔傾極振頽綱提劔風驅援旗電掃劉武
周不稽天氣實暗人謀怒窮轍以抗威臨焦原而自逸

公見縻昏偽迫以驅馳取譬辛毗甫依表而免戾同夫
馬援聊寄隗以偷全尚鞠醜徒據其危堞太宗俯離鳳
邸親御龍韜軍次介休將屠偽邑早欽英略深嘉義勇
飛箭以述皇威投金以申同德公鑒窮無象識照先機
虛西楚之如狼陋張角之吠犬遽歸真主期乎定人擢
授秦府統軍于時帝道維新王途多故瑞雞之野式靜
雲雷獻蜃之川來均霜露蕞爾凶狡久肆回邪載動神
兵龔行天罰救楚妙算雖獨運於沖襟授律宏規固思

憑於猛將乃以公為行軍總管遵彼前茅追奔若順海
乘茲破竹潰敵如決河積甲齊山中嶽由斯咸定封尸
築觀王城於是又安飲至鎬京策勲居最所賜金帛蓋
以千箱其後六統偏師五為總管北殲猾夏南廓滔天
戮鯨鯢於洙泗溺驂驪於漳滏所向風靡賞越彝班時
外難初康內釁方兆春坊階亂構禍深於戾園李屏窮
凶為蠹尤於傲象公早參帷幕思固宗祧驟起聖懷累
明大義九年六月二凶伏辜雖天道禍淫蓋賴君之算

也擢左衛大將軍兼太子左衛率貞觀元年授右武侯
大將軍屯兵數萬咸令統領職歷二官兼司七校龍飛
靜柝總禁旅於瑤山馬珥臨戎肅嚴兵於錡禁於是威
馳銀榜寵峻金吾拜上柱國吳國公食邑三千戶實封
一千三百戶若遷黼疏峰疑奄衡巫而廓鎮雷導風驅
瀉江漢以咸池餘礫涵輝明珠韜媚是稱奧壤獨擅雄
州佇寄惟良以敷景化連帥之重僉曰爾諧貞觀四年
授襄均鄧浙唐五州都督襄州刺史班朝驚俗載屏丹

帷虛犴遷遶寧因赭服布中和而驛化浹旁潤以馳威
惠澤潛通吐浪由其絕渚仁風普暢嘯谷所以浮江弛
風牘於東臯歲儲京庾契成麟於西序家知禮讓道彼
湘沅俗均鄒魯里稱冠蓋旣洽曠謠地接股肱佇求人
瘼八年授光祿大夫行同州刺史封建功臣改封鄂國
公冊拜宣州刺史昔炎周裂壤滎陽茂十邑之庸有晉
疇榮壯武峻重封之典校其優劣詎可扶輪累遷靈廊
夏三州都督懋茲宏德亟牧大藩控十角於星街信單

元塞總百城於天塹義偃朱方端委之風褫危冠而變俗
羶裘之長棄鳴鏑以歸仁紫封流渥朱輪徒傳莫不
情深借寇戀切留黃可謂柔遠以德人稱遺愛者矣既
而俯鑒忘筌景文成之茂躅深惟滿器躡太傅之高蹤
漏促銅儀循良夜之不怠體安玉杖諒坦路之難追奏
擬青規辭榮絳闕特迴天矐賜其誠請於是冊拜開府
儀同三司禮秩加等已而從容廊廟怡暢丘園架巖圖
蓮疏池瀉箭後堂歌吹通逸響於南隣別業林泉接芳

陰於西第加以陶風元穆

開二

勲胄兼之里遂高陽門

承通德故能聯姻瑤府結慶璿枝榮亞元吉寵班右威
清樓聳構遙通婺女之津黃閣凝扉近接天孫之館長
筵綺合韋珠與謝玉交輝廣廡雲浮羽籥共樞金遞奏
庭鳥効祉燮曜槐端隙駿流年俄潛柳次嗟乎巨川旣
濟奄遷舟於夜壑高臺遽傾倏摧梁於夢奠粵以顯慶
三年十一月二十六日溝疾薨於長安之私第春秋七
十有四皇上情切宗臣痛深國老舉哀別次罷朝者累

辰昔平仲云亡趨輪軫慟宣尼告逝述諫申哀未足方
此撤懸喻斯輟祭追贈司徒詞曰飾終之典實屬於勲
賢追遠之恩光歸於令望故開府儀同三司上柱國鄂
國公敬德志局標舉基宇沈奧忠義之節歷夷險而不
渝仁勇之風雖造次而必踐忠誠申於栢府茂績展於
行陣西漢元勲韓彭非重東吳上將吳鄧為輕著恭肅
於軒陛馳聲猷於藩岳方隆朝寄之榮便追止足之分
闡雄林而兼濟植高操而孤往道映千古譽光百辟與

善俄褰殲良奄泊永言遺烈震動於心宜崇禮命式旌
幽壤可贈司徒使持節都督并蔚嵐代等四州諸軍事
并州刺史餘官封並如故所司備禮冊命給班劔四十
人及羽葆鼓吹贈絹一千五百段米粟一千五百石陪
葬昭陵葬事所須並宜官給并賜東園秘器儀仗鼓吹
送至墓所仍送還宅并為立碑仍令鴻臚卿瑯琊郡開
國公蕭嗣業監護光祿少卿殷令名為副使務從優厚
稱朕意焉又下謚詔曰名以實稱事光於前典謚為表

禮縉厚於尊言故博聞強立少傅擅文成之美行剛服
遠冠軍膺景植之賜故開府儀同三司上柱國鄂國公
贈司徒并州都督敬德襟宇宏邵機神秘遠氣茂英果
情馳義烈闡雄圖而贊業標峻節以凝功道叶宗臣望
隆時宰爰升九命之寵宜享三尊之位福謙從說悼往
增酸奉上危身誠許國之貞操安人和衆亦經邦之懿
範詳式茲典錫以大名可謚忠武仍遣使持節備禮告
柩以顯慶四年歲次己未四月丁未朔十四日庚申陪

葬於昭陵禮也惟公資和清粹稟銳雷霆勇冠六軍不
失獨夫之色志澄四海期於萬里之外登范車而繹慮
撫陳室以棲情蒼壁內融負青冥其非遠白珪外審體
黃裳而愈固藝或微而咸綜技雖末而旁該象弭初彎
先穿臥石魚文且擊遂引飛泉擅扛鼎而推雄掩蒙輪
而効捷觀其事親孝事君忠居身節與士信識通其變
遠鑒窮於未形智括其神臨事期乎不測非外物之攸
獎咸宜體以自然運屬艱虞披荆而扶帝業功宣草昧

借箸以沃神襟載扈升陟爰參誓牧掩孫吳而高視輔
韓白以長驅是以捨代偃齊似青邱之吞夢澤推堅劔
銳猶黃鑄之穿魯縞祥符捧日亮堯景而增輝道契從
風變虞薰而演化故能丹書誓策青社疏榮位兆銜諸
疑資五申而統律寄深錫壤按十部以宣風年暨抽簪
禮優執醕懸輿勝躅昭茂寵於安車納駟高門峻朝章
於行馬斯所謂道烈可紀令終有倣者與有子右領軍
將軍寶琳鳳羽摛姿龍媒騁逸丞相之子道懋傳經王

公之孫望高倒屣掩八屯而効職副九列以騰芳履孝
揚名克隆華閎顯親穆譽爰樹豐碑紀德廬山載表茂
陵之域題貞畢陌式分京兆之阡庶令過客披文立名
可則故懷斯惠望拜知歸其銘曰商周龍躍尹望鷹揚
風雲宜感鱗翮曾驤於赫皇祚禔珍會昌錫茲元弼勲
烈推光茂德初誕英徽早暢狼宿摛精龜文協貺棄繻
關下受符圯上秘策金韜騰猷玉帳正心孤邵猛氣橫
飛長戈三捷雄戟雙揮蛟分承影雁落忘歸韜奇佇睿

屈跡乘機釁起射天妖凝鬪日明一光啓半千秀出道
契披捧功宣授律冀北先馳圖南載逸受脈揚威專征
耀武馬陵削樹雋方鑄柱雲卷鳴祠風謳嘯雨靜殺破
竹銷氛玉弩戎衣式定河帶同盟望高四履寵峻千兵
裂壤汾邑分麾柳營網羅方召躡跡良平出建隼旗入
參鳳輦名班贄玉賁光儀鉉朱戶吟笳青門樹冕金裝
甫散璇霜遽踐昔恭丹宸載奉薰琴今陪元禊空悲穀
林紛紛禮禱杳杳光沈闌桐永闕宰樹方信瞻言史策

遠振徽音

瀘州都督王湛神道碑

楊炯

惟漢高祖應天順人祭蚩尤於沛庭斬大蛇於豐澤則
豐沛之豪傑乘於雲矣惟漢光武龍飛鳳翔舉新市之
八千破王尋之百萬則南陽之佐命動於天矣我高祖
神堯皇帝以唐侯而建國從晉陽以起兵協和萬邦光
宅天下則太原之衣冠有大勲矣公諱湛字懷元太原
晉陽人也十一代祖卓晉給事中母常山公主河東有

湯沐邑因家焉葬於長壽原故鄉有太原之號皇業伊始公以中涓從事賜田鄴杜間今為雍州人也昔武王定於下人太子賓於上帝基艷鎬而開國籍神仙以命氏霸則司徒所讓位天子所不臣昶則孝弟於閨門務學於師友豈直橫江斬將南登建業之臺土食金溝北徙邛山之宅自茲厥後數百年國移三統周人共推其代祿家徙五陵漢朝不易其冠冕曾祖宗邁後魏中書侍郎彭城王府司馬周春官大夫都督晉陽侯祖亮本

州主簿司木上士隋贈信州刺史大名革於東魏天命
集於西周宗伯所以辨其儀林衡所以平其守父綽秦
孝王府掾仁壽宮監離石郡通守晉陽侯皇朝石州刺
史逆賊劉武周攻陷郡城因而遇害贈代州總管謚曰
烈侯禮也天造草昧王業艱難周師纔至於太原胡兵
遂入於離石負戶而汲不能定西戎之禍析骸而爨不
能解南楚之圍仁者殺身以成名君子有死而無貳公
承聖賢之末代屬喪亂之弘多天子乘輿方清秣陵之

氣諸侯斧鉞莫救驪山之烽國有命而何言邦無道而斯隱大業之季本州察孝廉非其好也高祖乃操斗極拜圖書再駕臨於孟津五星合於東井公解衣而濟策杖而行酈食其之長者逢漢祖而長揖袁曜卿之茂才見曹公而不拜從平霍邑授金紫光祿大夫入長安加左光祿大夫歷丞相相國二府典籤參軍事高祖受禪擢為通事舍人通直散騎侍郎封金水縣侯食邑七百戶尋遷虞部郎中丁烈侯艱去職尋起為隴西別駕商

郟二州刺史上柱國荊州大都督府司馬冀州刺史定
其封邑誓以河山蕭相立功於萬代雷侯決策於千里
願持一郡洛陽之任耿純兼攝八州江東之拜陶侃龍
朔三年遷使持節都督瀘滎溱珍四州諸軍事瀘州刺
史江陽縣地瀘水提封參伐下而為益州岐山上而為
井絡尺兵再戢黃昌兩日之歌槃木斯來景伯三年之
化功成露冕歲及懸車嘆疏廣之知足慕祁奚之請老
乾封二年上書乞骸骨詔公祿賜同京官仍朝朔望天

子歷吉日協露辰郊上元祀清廟詔公行太尉事國之
大事攝在有司蒼璧黃琮六玉以昭天地路鼓陰竹九
變而祠祖考名遂身退居常待終山川則羣望並走星
象則中台夜拆春秋九十有三以咸亨三年七月十七
日薨於京師永崇里謚曰敏侯喪事官給賜物三百段
粟三百石葬日車服徃還有司監護公幼鍾偏罰毀瘠
過人八歲讀書至無母何恃廢書慟哭嘔血數升逮事
繼親孝聞州黨思深母子比王元之事親夢感夫妻等

衡卿之至孝年纔一紀有若成人吏部薛公見而稱嘆
潁川之司馬德操早知劉廙譙國之夏侯泰初深明樂
毅兵次霍邑力戰有功高祖嘉之賜良馬一匹進圍京
城為伏弩所中高祖臨視賜物三百段流血及屨未絕
鼓音左輪朱殷豈敢言病武德之始奉使嶺南馮盎等
稽首稱臣獻琛奉贄舍人薛卓遇害北庭詔公責問單
于謝罪賜黃金五十斤雜綵二百段南踰漲海北度陰
山太中大夫去尉佗之黃屋高車使者作匈奴之鐵券

離石之難也枕干而寢見星而行號泣不絕聲者千里
水漿不入口者數日同武陵之任襲入構諸羌異河內
之張武空持遺劔吳遠由其得銘王裒以之攀栢冀州
境內舊多淫祀褰帷按部申明法禁詔書遷秩百姓攀
車立廟生祠樹碑頌德亦猶欒巴典郡山鬼潛移張禹
牧州江濤不起公出身六十載遺愛二十州遂罷方岳
之官仍居上台之位始於撥亂伊尹之輔成湯終於太
平軒轅之得風后然後拂衣高蹈躬覽載籍著遺誠十

八章盛行於代法文王周易之變象尼父孝經之篇窮
性命之理盡天人之際莊周著論生也若浮史佚立言
歿而不朽越文明元年二月十七日陪葬於獻陵禮也
長子朝散大夫行扶風令遐觀等生芻一束泣血三年
不踰聖人之禮能行大夫之孝京兆載開其新阡昆吾
用昭其舊德百年宮室宛在章臺之東五校軍營依然
茂陵之下其銘曰昔在湯武阿衡尚父下及高光蕭何
鄧禹皇天眷命赫矣高祖惟岳降神克生元輔攻城野

戰關張英武奇策密謀荀攸賈詡始陪營衛仍叅幕府
旌節龍沙軒旗象浦出臨方岳入調風雨其生也榮池
臺鐘鼓其死也哀陳兵復土孝乎惟孝無父何怙刊石
勒銘永傳終古

鄭太子碑銘

盧照鄰

若夫蒼精授邑載杓西鄰之際赤烏告祥方崇北面之
尊海內奔波三分與二分交競寰中同會七百與八百
相符故能安地軸之傾輪補乾絃之落紊如砥平道諸

侯遵卜洛之郊似石磐基宗子紹維城之固大矣哉周
之有天下也年將慶遠葉帶枝繁鄭國桓公宣王母弟
水雙河濟洩雲雨以開封舉二城平連古今而錫類犬
牙晉楚鼎足齊秦時遇鬪蛇之餘乍進牽羊之弊雖地
承負秦國祚彌而無窮天錫香蘭家風邵為逾遠太子
壽者康公之子桓公之二十代孫也聰明仁智暉映當
時涯涘清深指鼈川而激量珪璋特達與龍輅而齊光
因以運逢陽城敗我鄭次辛亥之歲崩山湯岍餒銳氣

於韓兵降志辱身飲盟符於晉血邑封千戶官具百寮
今之壽城斯其地也享年七十八薨于晉葬於天陵南
靈原超忽永深埋王之悲荒隴萋其誰識生金之字王
京觀道士鄭大量家長鄭君則合宗並太子之後勝業
孤揚清暉競遠逍遙林外放曠烟霞凝皓素於黃庭養
神氣於元宇以為霓旌揚漢猶尋朽骨之靈鶴駕停空
尚謂先人之墓於是芟荒薙蔓徙植延陰豐碑下鹿蘆
高墳疏馬鬣得青烏之舊地臨絳邑之新田於時大唐

總章元年歲次戊辰五月甲申之一日也爾其表裏山河極目原野九京以送其往二水以流其惡山巖霜雪邀處子以同嬉奮岳衣冠侶羣僊而共遠窺晉臣於泉路依稀夏日之光思漢帝于雲衢髮鬢秋風之詠雖復相望絕代固可氣類同年豈使素烈景風清猷澹味金石之美堙滅而無聞乎故式紹前範傳之永代將日月以居諸邈宇宙而長久詞曰周封懿族鄭國開疆始連高華終帶熒芒東西橘徙人物絳香蕭條河曲隱軫榮

陽戎馬生郊兵車亂轍衆雄相競羣公未絕煙塵四起
縱橫四結園寢成泣偏陽成血家聲已墮出質而來西
光未謝東府行開鄉關寂寞城邑徘徊三鄉二鄙風月
池臺廣陽已失年其不朽魄散東山魂歸北邙披榛卜
葬分晉獻絳露泣即泣雲屯即愁川源遽徙居處不畱
源旣號靈城猶名壽摧殘剪樹零落為土碑失黃龍石銘
摧白楸猗歟積善克昌後胤丹竈九飛清溪千仞眷茲
幽隴清風丕振勒石揚聲聞之陳信左右原野表裏山

河析城王屋汾川帝歌新城樹少故絳人多悠悠萬代
見此如何

三受降城碑銘

呂溫

夏后氏遏洪水驅龍蛇能禦大菑以活黔首周文王城
朔方逐獫狁能捍大患以安中區若非高岍峻防重門
擊柝雖有盛德曷觀成功然則持璿璣而弛張萬象昊
穹之妙用扼勝勢以擒縱八極王者之宏圖道雖無外
權則有備變化消息存乎其人三受降城皇唐之勝勢

者也昔秦不量力北築長城右扼臨洮左馳碣石生人盡去不足乘障兩漢之後頽為荒丘退居河澨歷代莫進矯亡秦之弊則可矣盡中國之利則未然唐興因循未暇經啓有拂雲祠者在河之北地形雄坦控扼樞會虜伏其下以窺域中禱神觀兵然後入寇甲不及擐突如其來鯨一躍而吞舟虎數步而擇肉塞草落而邊氓懼河水堅而羽檄走爰自受命至於中興國無寧歲景龍二年默啜強暴瀆鄰構怨掃境西伐漠南空虛朔方

大總管韓國公張仁愿躡機而謀請築三城奪據其地
跨大河以北嚮制胡馬之南牧中宗詔許橫議不撓於
是雷及瓜之戍斬姦命之卒六旬雷動三城岳立以拂
雲祠為中城東西相去各四百里過朝那而北關斥堠
迭望幾二千所損費億計滅兵萬人分形以據同力而
守東極于海西窮于天納陰山於寸眸拳大漠於一掌
驚塵飛而烽火耀孤鴈起而刁斗鳴涉河而南門用晏
閒韓公猶以為未也方將建大旆提金鼓馳神竿鞠虎

旅看旄頭明滅與太白進退小則責琛費受厥角定保
塞一隅之安大則倒狼居竭瀚海空苦塞萬里之野大
略方運元勳不集天其未使我唐無北顧之憂乎厥後
賢愚迭任工拙異勢剛者黷武柔者敗律城隳險固寇
得凌軼或驅馬飲河而去或控弦劇壘而旋吾知韓公
不瞑目於地下矣今天子誕敷文德茂育羣生戢兵和
親北狄右衽然而軍志有受降如敵大易有安不忘危
崇墉言言其可弛柝亦宜鎮以元老授之廟勝俾述舊

職而恢遺功外勤撫綏內謹經略使其來不敢仰視去
不敢返顧永龍猛氣無生禍心聳威馴思禽息荒外安
固萬代術何加焉敢勒銘城隅庶復隍而光烈不昧銘
曰韓侯受命志在朔易北方之強制以全策巨漢橫塞
揭茲雄壁如三鬪龍躍出大澤並分襟帶各閉風雷俯
賜陰山仰看昭回一夫登陴萬里洞開日晏秋盡纖塵
不來時惟韓侯方運神妙觀釁則動乃誅乃弔廓乎窮
荒盡日所照天乎未贊不策清廟我聖耀德罷扃北門

優而柔之用息元元曷若完守推亡固存于襄于夷永
裕後昆

祀北嶽祠碑

張嘉貞

有國者殷薦於天地望秩於山川故災沴不生矣有家
者嚴敬於鬼神克諧於禮樂故休祐斯應矣由是上下
交泰幽明相協五精同朗辰為水其味鹹五鎮俱清恒
為冬其音羽大哉茲嶽殊於衆山高華乃踳乎近甸衡
岱不踰乎方域孰與夫包括綿長經綸中外其頂也上

扶乾門黑帝之宮觀其足也下捺坤軸元神之都府豈
止劈冀魏截幽燕拒洪河撐大海瀕洞合沓半天下之
襟帶嵯峨巉巖一字內之標格者也故知惟土有精惟
山有靈宵宵冥冥其道至平其德至貞氤氳馨馨目之
不覩夫形耳之不聞夫聲陰陽不測夫奧所以存像設
建祠庭矣稽彼上古洎於中運五載巡狩百神懷柔皇
王令典以之叶祚歷數昌期以之交泰自嬴漢逮周隋
匪修匪虔或僭或侈不勤於省者其政缺非美而封者

其事訛嗚呼黷祭虛陳昭靈罔答更張禮秩固待雍熙
粵若我唐正百王頽教恭惟我后揚五聖丕烈人神允
浹動植和暢乃籍北鎮柴南壇碑西岳泥東岱是用告
厥功祇其祠也故穰穰介福獲於彼顛顛衆心俟於此
邊隅於是乎靜稼穡於是乎豐豐以阜人靜以安俗俗
安而人阜君睿而神聰惟神幽贊已成惟君能事斯畢
北巡之禮胥詠其蘇雖黜輅纁旗未由冬覲而圓珪方
璧每自天來或事舉必祈福行宜賽則有公卿而奉新

命或四時薦熟三獻酌洗則有侯牧而率舊章非夫昭
信雄直豈常享於明代哉是以河朔人風潔誠而禱蠶
穀者多矣春終秋孟冬首三之月尤劇蘋藻自羞若從
官斂樵蘇不禁孰能私伐蓋威靈感通以致耳與其淫
恤而求者異乎夫道莫先乎貞政莫先乎淳參造化以
成萬物莫先於神資帝王以富四海莫先乎人護神莫
先乎君理人莫先乎師丙寅歲乃命菲才謬兼軍器欽
若明詔持兵導俗無敢懈怠名山大川著乎典式靡不

加敬於昭神寢於岳之陽伊岳致神伊神主岳高柯古
幹幽蔚陰翳俯仰瞻對精魂肅恭慄然何為故以嗟歎
嗟歎不足於是詠歌歌以發言言以彰德事可追於風
雅詞無隱於聞見神而聽之頌斯作曰五宿熒煌風政
休咎上經乎乾綱我君順之祚乃久兮五宗磅礴陰化
成敗下彰乎坤絡我君欽之福乃介兮天平地成神道
助貞人事以寧兮皇極帝力神道助直人事以息兮禎
祥日新既祠既禋國萬斯春兮風雨若時是耕是穫家

勤於初兮至誠通兮昭冥協和至道默兮對揚頌歌大
恒如礪明德惟峨唐開元十五年碑在西碑房自書

贈太尉裴行儉神道碑

張說

星辰懸象所以殷時布氣然而行不言之道者天也文
武用才所以勤官定國然而收無為之理者帝也當高
宗之休運任名世之良臣清九流而闢四海代天工而
張帝德歷選前哲豈多乎哉公諱行儉字守約河東聞
喜人也其先出於嬴姓伯益之後也秦則裴侯始封漢

則侍中受職魏晉之代鬱為盛門八裴方於八王聲振
海內三子尊為三祖望高士族自冀州刺史徽至公十
二代中軍將軍雙虎至公六葉代無遺德不隕厥問者
已大王父伯鳳周驃騎大將軍光汾二州刺史琅琊郡
開國公大父定高大將軍馮翊郡守襲琅邪郡公諸侯
受封山河傳國天子共理循良克家考仁基隋左光祿
大夫以陰圖王世充義拔舊主遭時不利王折名揚聖
唐龍興旌淑勵節贈原州都督命謚曰忠蓋春秋之褒

也公清明本乎世德正性出乎胎教氣潤河靈貌雄岳
立仁孝之道天生而知將相之器與年俱長以高蔭為
弘文生絕事篤學累年不舉房僕射異而問焉對曰隋
室喪亂家亡典籍館有良書探討未徧故少畱耳梁公
驚曰驥子志氣凌雲一日千里其早為通人之目也如
是明經補左屯衛倉曹詔舉轉雍州司士選金部戶部
二員外歷都官郎中長安令明慶中與長孫太尉褚河
南論及中宮廢立國家憂患有公伯寮譖行於季氏出

為西州長史又改金山副都護又拜安西大都護西域
從政七八年間窮荒舉落重譯向化我之獨賢邊之多
幸乾封歲徵為同文少卿尋除司列少常伯官復舊號
為吏部侍郎加銀青光祿大夫自居銓管大設網綜辨
職差才審官序爵法著新格言成故事上元中長星出
天禿髮入塞詔公為洮州道左軍總管又為秦州鎮撫
右軍總管並受元帥周王節度雖祭公有諫耀武之事
不行而方叔帥師來威之道備矣儀鳳二年十姓生可

汗匐延都支及李遮匐潛搆大戎倣擾西域朝廷憑怒
將行天討公進議曰敬元敗績於茅戎審禮免胄而入
狄豈可絕域更勤王師今波斯王亡侍子在此若命使
冊立則路由二蕃便宜取之是成擒也高宗善其計詔
公以名冊送波斯兼安撫大使公往莅遺愛洽於人心
是行也百城故老望塵而雅拜四鎮酋渠連營而誌酒
一言召募萬騎雲集公乃解嚴以反諜託獵以訓旅謀
之多方間其無備裹糧十日執都支於帳前破竹一呼

鉗遮匄於麾下華戎相慶立碑碎葉蓋美克雋不殺而
用謀安人以德而去害廓氛祲於地表燁皇靈於天外
充國有屯田之頌竇憲有燕山之銘訂茲遠略彼何微
也遷禮部尚書加上柱國又特降恩命兼右衛大將軍
夷典秩宗神必據我文昌有將天道存焉調露中單于
可汗伏念外叛大鴻臚蕭嗣業喪律詔公為定襄道大
總管軍至朔州斥堠相接匈奴故態狃劫糧以餒師神
將出奇張虛勢以啗敵偽為轉運伏其壯士示羸師以

綏行隱精騎以躡迹寇果大下援兵奔散驕虜益驚自
為得色驅此車牛憩彼泉井於是箱中兵起干弩齊發
要路騎飛一息而至羣胡顛沛殺傷滿野從此饋運路
無驚者觀夫大漠無倪穹廬靡所追之逃遯捨之憑陵
費日老師兵家所病公潛使緩頰均其利心深圖既入
狼意亦改及委罪衙官陰送降款公密上其事人莫之
知及如所期舉國歸附煙塵大起師徒惶惑公徐使令
軍曰此是伏念執溫傳來降非他寇也俄而銜璧轅門

釋縛納欵帝嘉厥勲命尚書崔知悌乘驛勞軍備禮獻
凱冊勲之日程務挺張虔勗者行軍之偏將也訴言予
勞逼逐方降大軍又屬秉鈞忌才上下其手公曰雖不
逮羣師之讓功猶恥與二王之競力今而殺降後無來
者乃封公聞喜縣開國公而伏念溫傳皆戮都市是年
也伏念弟元珍擁其餘種復叛則天稱制追正宿枉贈
伏念太僕卿程張諸家別故夷族君子以為神理之不
可誣也永淳元年詔公為金牙道大總管未行遘疾四

月二十八日薨於京師延壽里春秋六十有四長子貞
隱早卒嫡孫參元嗣封藐是諸孤哀哀幼童高宗悼焉
贈幽州都督賜凶儀還鄉喪葬官供禮部郎中監護窀
穸之數率禮有加別勅畱守委皇太子擇六品京官一
人檢校家事五六年間待兒孫稍成長日停寵極哀榮
禮之厚者澤周存沒義莫重焉太常議謚博古多能文
武表式曰憲其年十月葬我憲公於聞喜之東良原禮
也神龍中興朝思舊德贈公揚州大都督開元孝享宰

嗣延恩贈公太尉生不登于台階沒追位乎靈庠序四
時於地下調三光於天上聖人神教意在茲夫公志堅
慮精神勇識澈藝必討本學皆覩奧又善測候雲物推
步氣象鬼無遁謀靈不藏用著文集二十卷造草字數
千文皆寶傳人間以為代法撰選譜十卷又為軍營行
陣部衆料敵等四十六訣大聖天后令秘書監武承嗣
就家取進以為秘術豈比馬卿浮華難畱封禪之草劉
安虛誕空傳鴻寶之書而已哉加以汲引沈淪推獎氣

類虛懷而襟帶不設弘亮而城府洞開故虎旅雲從詞
林響應若羽毛之宗麟鳳衆川之長江河也在選曹見
駱賓王盧照隣王勃楊炯評曰炯雖有才名不過令長
其餘華而無實鮮克令終見蘇味道王勣嘆曰十數年
外當居衡石後各如其言其在軍麾擇帳下之士則有
張知運薛訥閣敬客甘元暕裴思諒王智方呂休璟劉
元意引偏裨之將則有程務挺張虔勗王方翼崔智瓘
党金毗郭待封劉敬同李多祚黑齒常之凡所進拔盡

為名將此則有道之人倫武侯之賞鑒也公之送波斯也入莫賀延磧中遇風沙大起天地暝晦引道皆迷因命息徒至誠虔禱徇於衆曰井泉不遠須臾風止氣開有香泉豐草宛在營側往來之人莫知其處此乃耿公之拜井商人之化城也公在禮闈勅賜善馬及寶鞍令史奔馳馬倒鞍破懼而逃罪公使詔之曰知汝誤耳又平都支遮副大獲珍異酋長將吏請遍觀焉有馬腦大盤希代之寶也隨軍王休烈捧盤跌倒應時而碎叩頭

流血惶怖請死公笑曰事有不意何至重玉而害人乎
此又文饒之含容邴吉之仁恕也公西擒都支北降伏
念前後錫馬五百匹僮二百人金銀器物三千器錦罽
織皮三百段公受置庭中旬日散盡此又趙奢之待士
田文之市義也若夫知人以為本感通以為行善貸以
為常散積以為樂古之有道者從事於斯矣公元夫人
河南陸氏兵部侍郎爽之女也陸氏卒繼室以華陽夫
人庫狄氏有任姒之德班左氏之才聖后臨朝召入宮

闕拜為御正中宗踐祚歸養私門歲時致禮媪后補天
進參十亂少康嗣夏退叶三從晉朝公卿列拜虞潭之
母周官音注近同韋暹之家皇上臨極旁求陰政再降
綸言將留內輔夫人深戒榮滿遠悟真筌固辭羸憊超
謝塵俗每讀信行禪師集錄永期尊奉開元五年四月
二日歸真京邑其年八月歸窆窆於終南山鷓鳴堆信
行禪師靈塔之後古不合葬魂無不之成遺志也長子
參元官至涇鄧二州刺史聿修厥德人亡道存次子延

休并州文水令世載文雄家傳草聖次子慶遠協律郎
深達禮樂克和神人咸負長才同淪短運季子光庭侍
中兼吏部尚書輔政邕熙致君堯舜孝理發乎陵廟仁
澤遍乎松檟是故妻以夫榮母以子貴以尚書先贈方
伯申命上公夫人舊封華陽增號晉國詩云文武吉甫
萬邦為憲上公有焉又曰彼美孟姜德音不忘小君有
焉孝經云立身行道以顯父母侍中有焉合三德而為
家橫百代而濟美信可以言時稱代鏤石刊金者歟神

道前銘薛令所撰具有後命俾余繫述馬遷世家益孟
堅之一傳劉寬表墓並伯喈之兩碑報德教忠俱傳不
朽銘曰天生亞聖祚此王國文綜九流武參七德柔遠
服叛窮西盡北赫我皇靈去其蝥賊仁則不遠智何不
周如山之峻如川之流術與神合藝將道遊書來懸帳
賦出登樓司馬軍陣官人綱紀帝加常伯國於聞喜室
有令妻家成克子社金傳世桓圭守祀神道上台永介

邦社

侍中兼吏部尚書裴光庭神道碑 張九齡

夫道遵常習故蓋人拘於凡也得精亡麤是天縱於聖也方聖上之拔太師也豈籍譽於朝廷哉徑取士於無跡懸收功於未朕而終致大用克成休勛使祖虛名者見西子而憎貌工橫議者聞魯連而杜口乃知古謂則哲維帝其難今之得人遇聖為易能允明主之鑒不負真賢之實者其在正平忠獻公乎公諱光庭字連城河東聞喜人也伯翳之後與秦同姓始封於裴因邑命氏

魏晉之際為人物之傑與瑯琊王氏相敵時人謂之八
裴八王自茲厥後奕代更盛大王父定高周大將軍馮
翊太守瑯琊公大父仁基隋光祿大夫追贈持節原州
都督天之既厭隋德矣見危致命不亦難乎謚之曰忠
春秋之義也皇父行儉禮部尚書兼定襄道行軍大總
管開喜縣公贈太尉時或有奸王命禁暴安人不謂重
乎謚之曰憲尊名之典也公即憲公之第七子降神元
和舍光不耀越在初服已有老成雖遠大是圖而近識

莫悟學探帝載何事小名業綜人倫豈矜一善弱歲居
太尉憲公喪幼以孝聞尋補弘文館學生神龍初明經
擢第授家令寺丞轉太常丞加朝散大夫景龍中以親
累外轉尋入為陝王友改右衛郎將丁晉國太夫人憂
柴毀骨立殆至滅性服免起丹州別駕未之就也復除
右衛郎將無何遷率府中郎嗟乎有其道而無其用不
可行也得其時而不得其志亦不可行也公負經綸之
器韜王霸之略自委泊外臺棲遲下位出外從事十數

年間坦然而自若者何哉蓋知才有所必伸命有所必與非苟而已開元中聖上思光祿之休烈嘉太尉之元勳是必象賢其將大受特拜司門郎中轉兵部侍臺之文始應列宿鴻漸之羽可用為儀遷鴻臚少卿以觀其能也是歲天子有事於岱宗諸侯會朝於行在執籩豆者不限於中外獻琛賫者亦勤於駿奔莫不來享無有遠近而執政以公代曉邊事職在行人且曰夷狄豺狼黷盟阻德我今有事戎或生心我張吾師有備無患若

何公曰不可夫封禪者所以告成功也觀兵者所以威
逆命也云亭苗扈非一時之事也受脤執燔非三代之
禮也天方佑我光啓舊服憬彼獯鬻能違天乎無庸勦
人可以謀告從之秋九月突厥果使其相執失頡利發
與其介阿史德暉泥熟來朝公之謀也東封還遷兵部
侍郎祈父之職夏卿之亞存而舉者悉以咨之公於是
考遺訓補闕典序蒐苗獮狩之禮詳施稅簡稽之賦頒
九畿之政設九伐之刑以練國容以精軍實邊鄙不聳

帝用嘉之既而拜中書侍郎同中書門下平章事兼御
史大夫正出其言需乎人有歸也天憲惟明肅乎人知
禁也尋加銀青光祿大夫換黃門侍郎俄遷侍中兼吏
部尚書弘文館學士總百揆之樞轄酌九流之淵奧叶
文軌之殷受天人之和木火象鼎其惟實鍊山川出雲
用作霖雨時哉之會無得稱焉先是大化之行務以元
默遵夫易簡舊章在而不議吏道雜以多端公於是求
革故之實契隨時之義作秩序以平之設循資以定之

謹權衡以選之考殿最以參之奸回無所措其邪噂咭
不能介其量多士動色羣方改瞻仰之者邈乎如山窺
之者間不容髮或曰執事無乃惠歟公曰大命敢不敬
歟若然方將致六符於泰階驅百姓於仁壽豈直睥睨
先正紛綸近古汨而隨流守而勿失云爾哉二十年冬
上幸河東祠后土命公兼左軍師禮畢賜爵正平男加
光祿大夫抑人有言曰樹善莫如滋積仁莫如重則臧
僖之慶有後於魯樂武之德未絕於人宜公侯之子孫

必復其始也公嘗讀易至乾之屯升之漸喟然嘆曰物
惡有滿而不溢高而不危者哉既而居不崇侈動無踰
法雖百乘之家萬夫之長冲如也謂日用不知存諸方
冊何天年未永瘳此台臣二十有一年春三月癸卯遘
疾薨於京師平康里之私第春秋五十八朝廷哀傷冕
旒震悼制戶部尚書杜進卽殯弔祭賙物五百段粟五
百石喪事優厚官供輟朝三日丁未有詔追贈太師謚
曰忠獻使其官某監候喪事以某月日葬我忠獻公於

聞喜之舊塋禮也初知星者言上相有變良臣將歿謂請禳之公曰使禍可禳而去則福可祝而來也論者多之以為知命夫天下之達道有五所以行之者三曰忠孝仁安君忠也榮親孝也周物仁也此三者有一於身鮮矣而公實兼之且媚於人者必好其威福賢於事者必羞其謗政公知其然則以直道匪躬之故忠莫厚焉禮為人子春秋以致享義於人臣夙夜以從命公知其然則以時告如在之敬孝莫重焉夫以衡石之任陶鈞

之力莫不責於下吏求備於一人以故舞文雷同疑獄
歲構恬而不改浸以成風公知其故則以信察御物之
惠仁莫加焉其行已奉公皆此類也嘗所著述率於箴
規以為惇叙九族本枝百世王者之盛也而義不可以
無訓作瑤山往記維城前軌以諷之微而彰志而晦聖
人之舉也道不可以虛行作續春秋自戰國迄於周隋
以統之臣子義也天人之際備矣非洽聞通理其孰能
與於此乎宜其存無幸人歿有遺愛嗣子積京兆府司

錄事死軍孝實克家動必中禮丕承厚命紆天鑒而增
華敢跡前修琢豐碑而不朽銘曰益作舜虞鍼分晉土
慶流八族德盛三祖瑯琊象賢懷文佩武光祿忠烈殺
身報主尚書出將恢我王略文教內敷武功外鑠緇衣
之弊惟公繼作用晦而明處豐思約鴻臚好謀夏卿稱
職代天施化佐皇立極納於憲府好是正直乃宅冢司
謀猷允塞盡瘁事國夙夜在公居無闕正歿有餘忠天
子命我頌德銘功日月有既令聞無窮

夏州都督王方翼神道碑

張說

良玉禮神用之西序之器拾之南山之璞罔然不有其
珍也君子安命進之扞城之雄退之去國之老隤然不
失其正也語夫杖運以行道屬辭以比德亦何代無其
人哉公諱方翼字仲翔太原祁人王周之後也王子以
敗敵受姓徵召以遁世為名司徒之濟艱難義形漢室
太尉之圖舉甲心盡魏朝聞蔣濟所言則知尚書志力
兄弟繼美覽周書所載則見潁川忠烈子姓皆封臣節

奮揚於百代家聲藉甚於四海大王父司徒定公秉隋氏之崇也王父駙馬開府文公裕先朝之懿也考特進慎公仁表皇室之甥也公門總四岳之靈帝子分五潢之氣是生時傑鬱為人紀公雄姿沈毅凜難犯之色虛懷信厚坦招納之量識略精斷達應變之權神守密靜堅不奪之節孝友內兆於免懷忠信外灼於旣冠加以思參造化誠合鬼神文其詩書武其韜略推此才也以從政焉永無匱矣夙遭家難哀過柴瘁京師號曰孝童

王母同安長公主引貴遊之誡示作苦之端今太夫人
徙居郿墅儲無斗粟庇無尺椽公躬率傭保肆勤給養
墾山出田燎松鬻墨一年而良疇千畝二年而厦屋百
間口舉壽觴厭珍膳矣處約能久不亦仁乎在困能亨
不亦智乎永徽初始宰安定誅豪暴以育人察奸宄以
申寬異政三舉清風一變除瀚海都督府司馬以母疾
辭職為姜恪乘便遂徙朔州尚德府果毅歲餘王本立
上書理公國之悖孝不宜擯抑有詔徵還而親不待心

與哀絕氣屬禮存詔御醫孟默朝夕診視免喪踰年僅
堪履立樂成公東討新羅薦為將師詔公持節雜林道
總管軍停不行授沙州刺史未至改拜肅州以為慢防
啓寇非重閑也乃大築雉堞嚴備櫓械人知有恃戎亦
來威儀鳳歲河西盡蝗獨不入州境隣郡湊稔提挈如
雲公傾私泉以資乏引激水以立磴舉火百奎日哺千
人遂有芝草叢生豐年屢降人之詠德刊石存焉裴吏
部名立波斯實取遮匄偉公威厲飛書薦請詔公為波

斯軍副使兼安西都護上柱國以安西都護懷寶為庭
州刺史大城碎葉街郭迴互夷夏縱觀莫究端倪三十
六蕃承風謁賀洎于海東肅如也無何詔公為庭州刺
史以波斯使領金山都護前使杜懷寶更統安西鎮守
碎葉朝廷始以鎮不寧蕃故授公代寶又以求不失鎮
復命寶代公夫然有以見諸蕃之心搖矣於是車蒲啜
首唱寇兵羣蕃響應蝟毛而豎公在磧西獻捷無虛歲
虓車蒲於弓月陷咽麪於熱海剿叛徒三千於麾下走

烏鵲十萬於城外皆以少覆衆以誠動天葛水暴長祭
撤而三軍涉渡葉河無舟兵叩而七月水合由是士卒
益勇戎狄益懼璽書下問皇靈遠爍遷夏州都督徵詣
奉天宮熱海之役流矢貫臂陳血染袖事等殷輪帝顧
而知之視瘡歔歔曰為國致身乃吾親也妖賊白鐵余
據城平以反奉詔與程務挺討擒之善公有發石壞城
之計反風焚柵之感封太原郡公元珍寇邊受命討擊
公以無甲乃發思造六片木排袴關鉤解合畫為虎文

比至關先與虜合戰若驅猛獸蒙畢比莫之敵也胡馬奔駭獲其二啜桑乾舍利兩部來降初公善書與魏叔琬相輩工射與趙持滿齊名帝每矚之賜比鳴輦賞深懸帳嘗獨行夜入有怪人長丈直來趣逼射而仆焉乃朽木也太宗壯之授右千牛及持滿伏法暴骸公哀而收葬為金吾奏劾高宗義之釋而不罪履道坦坦多如此類適將任帝夔龍為國方虎天下膏潤羣生雲雨惜哉不辰悄焉遘侮嗣聖之際天后臨朝有凶人誣奏公

廢后從兄常懷怏怏司刑御史侮文矯制不名等法遷
於崖州路至衡山寢疾捐館春秋六十三垂拱三年閏
正月二十九日葬於咸陽原君子曰斯才也斯望也難
乎免於斯之代矣周公聖而謗屈平賢而放賈誼才而
謫李廣勞而喪彼天命之糾紛此人情之惆悵神龍中
興以陷酷吏例復官爵孝為人極忠為令德神之聽之
始枉終直信矣有子故光祿少卿璵今秘書監珣皆篤
行純孝慎終思遠說少也蒙會友升堂今老矣豈能旌

墓遷司漢籍感激論都尉之書邕叙彪情追美樹楊公
之碣銘曰上德惟公氣秀才傑孝宏世美忠廣前烈日
月必照江河思決難地必通暗機先徹卓犖文藝崢嶸
武節勤由宰邑借恂臨郡海女避途山蛇可問師律三
總軍聲六振銳氣入營長雲出陣嚴肅將威烜赫天外
玉弩方擎雲旗卷旆天道茫茫自古多傷功存西域身
棄南荒易箠中路懸棺反藏寶刀生衣玉映無光後有
才子先賢不亡

后土神祠碑銘

玄宗

古之王者皆受天命禮樂有權神祇是主郊兆所設雖
定於厥居精靈所感則通乎變化大匠歸正旁行不流
惟創制者為能之亦安在守文而已睢上祠者本魏地
鄒丘之舊而漢家后土之宮汾水合河梁山對麓地形
堆阜天然詭異隆崛岉以特起忽盤紆而陡絕景象相
傳胼蠻如在有物不可以終否有典不可以遂廢故推
而行之神而明之歲在癸亥始有事於茲焉在昔后土

時邁省方柴燎告至幽隱胥洎大舜則五載一巡武帝則三歲一祭今時代丕變人神禮煩朕就為損益折以法度一紀再駕亦無闕焉二十年冬勒兵逾萬騎旌旗亘千里校獵上黨至於太原赫威武於朔陸霈展義於南夏肆覲羣后道有大備懷柔百神文無而咸秩先是有司宿設恪敬乃事己未師頓於齋宮庚申親祀於后祇聖考在天侑而作主何禮不舉靡神不徧徃者漢氏之祠也牲以養牛五歲繭粟無所責其誠藉以采席

六重藁秸不得尚其質事與古反義不經見朕因其地而不因其儀取其得而不取其失凡牲幣法物之事歌舞接神之類咨故實於方澤不遂過於元鼎此皆公卿大夫鴻生鉅儒獻其方聞匡於不逮朕何有也且王者事天明事地察示其本教以孝奈何郊丘之禮猶獨以祈穀為名者耶於戲享於至誠錫以繁祉黃雲蓋於神鼎絳光燭於靈壇自昔已然乃今復見斯固陰精有所寓寶氣為不誣雖寂寥而不動亦動之而斯應顧朕之

不德靈感何從賴累聖儲祉福流所致乃肯宥肆赦與
物更始大賚天下有慶兆人山川鬼神鳥獸魚鼈莫不
允若莫不咸寧此所以承覆載報生殖資元元盡翼翼
豈與夫封禪有牒專在求仙秘祝有辭密於移過而已
銘曰至哉坤元萬物資生王者母事德合天明義有大
報用協永貞茫茫九土思索其精因天事天因地事地
彼汾之曲高雉傑異景象遺光壇場舊位寂寥于祀精
靈長閔誣神不祥復古維祺文所無者秩而祭之矧曰

后土昔載明祠何必因陰乃為我師意多漢武跡在橫
汾風流可接簫鼓如聞壽宮創制神鼎勒勲古往今來
豈無斯文

北嶽府君之碑

婁虛心

嘗試論之曰融為瀆結為阜則詞人之體物詳之矣知
樂水仁樂山則聖人之微言列之矣或乃參里愚谷因
居以制號紫蓋白雉象形而定極分石帆而為破石對
射的而云射堂武關之啓地門下都之建天柱莫不萬

彙斯毓五精是應必踐魑魅之塗式作隱淪之宅傳諸
簡牒備乎聞見竊比岳宗自均魁父北嶽恒山者北方
之巨鎮也爾其岡巒紛紜根底磅礴或壁立或砥平傍
匿千嶺下括衆壑珍禽竒獸益虞之目駭不能名芳草
甘木桑弘之心計莫之數瓊膏石髓慶忌林岳時時聞
出徃徃迭見舒丹氣籠翠微薈蔚朝躋披重壤以雲畜
騷屑慕起吸萬籟以風怒漢宗聽宋昌之策以諱遷常
趙主從姑布之談以賢臨代林麓之富何有何無但觀

夫萼容峭峙地勢坱圠迤太行而綿碣石負寒谷而面
冰川限華夷之表裏壯宇宙之隘害培塿九折胚胎四
朔一佇望州載磔瞻魯崇爨以畫匪阡危以增牒清廟
如在不加敬而自祇夫其重扃固護交軒密勿三間四
表神莫莫以扶傾東序西廂心鯁鯁而發悸朱鳥拂棟
玉女窺牕藻績丹青侷赤城之霞起圖寫精異疑絳河
之仙集恍恍忽忽若陰若陽吁可畏乎其駭也以則天
二年有瀛州清苑縣人魏名確爰因行李至岳廟之前

乃見二人一者白衣一者紫服侍從甚肅進止不凡自云我是五岳大使發岳馬六十萬衆為國討賊五岳大神九月三日俱來此山大為歡會名確遷延未去諸神遂乃作怒牽至廟中用申責罰祝史揚仙童親見其事乃馳告官司州將駭之隨以奏聞勅遣上官及內謁者齎神衣禮物以赴會期凡厥寮采共陪享祭惟神妙略遐舉猛銳長驅不勞載鶻之師已決陣蛇之效國家德邁堯封道兼虞覲盛唐八詠竭南服以登滯訓夏從遊

窮西荒以銘弁垂首貫胸之族俗有望雲文鉞碧砮之
之責府無虛月瘞峰沈渚不爽於告成五載四朝自遵
乎升道書云十有一月北巡守至於北岳豈不以崇望
秩之儀備矣得諸侯之度宏矣以為不嚴而理本乎禮
樂既富而教寄以循良晤甘棠之匡坐借長孺之高臥
刺史高豫化以亂繩導規長者採其宣布託諷虛儀一
澄睇於露冕幾揚仁於風扇長史嚴懷珪司馬董棊漢
編博達西蜀明其犯斗晉政記言南史推其直筆恒陽

縣令劉元宗系肇御龍位光馴雉蒲城務簡歎淹中以
勿欺丞王晏洛汭浮仙淮流襲慶楚國在壇之寶庾室
豐年之玉文章雄伯昔入仲宣之疏人物雌黃今得林
宗之拜主簿姚繪之尉閻宏搏扶逸翮未遷振鷺之行
縱壑巨鱗且任烹鮮之輔岳令司徒乾超和光偶俗內
剛外柔不附膏腴自安下仕鄉望等並海岳精靈燕趙
奇傑賓從奕奕選徒於擁篲之賢氣調凜凜結友於負
荆之將平原旅食是日處囊太子新交乘風聽筑地極

殷阜袷服如雲俗尚儒術青衿成市侶琴樽以卒歲優
哉游哉狎泉石之娛老無營無欲手舞足蹈異口同音
詢墨客於千里標黃兒於億載故能屈蔡中郎之詞彩
以紀豐碑訪王右軍之神蹤以鐫金石其詞曰土之聚
兮成山山龍從兮石爛斑屹常岳兮作鎮披重壤兮聳
千仞將觀日以齊崇兼極天而比峻跨荆陘迤蓬壺挾
慕容之舊都帶簡子之藏符列真宇兮隱淪宅岩花開
兮樹菓圻既成天地險又作華夷隔嚴祠沕穆神儀儼

雅迫而察之駭人也雕楹翕絕兮緱駁綠靈清冷兮露
灑獯虜咆哮承薦北郊岳靈赫怒兮殄落傾巢銘十角
於燕嶺獲隻輪於晉嶠皇道正明兮泰階平梯山驟水
兮奄裨瀛順出豫兮勒功成一巡四覲兮考幽明寄剖
竹兮仁風清名題輿兮康歌行郎出宰兮百里榮桓不
樂兮下安輕州縣勞職兮人之英恒碣降神兮岳之精
詢謀僉同兮表志誠披文相質兮蹟堅貞慙一字兮莫
與京傳千祀兮昭令名髣髴風塵兮垂頌聲開元九年

碑在曲陽廟西碑房陳懷志書

屯畱令薛僅善政碑

徐季鵠

開元二十年有勅將幸太原重巡潞藩上顧謂侍中裴
光庭先擇才能俾宿儲供公以左拾遺膺是選也潞州
八邑屬時不稔上下克辦實多宏益朝廷稱之公名僅
字沖用漢御史大夫廣漢之後以儒術學業遂登三公
直言諫諍退官終寵其後自沛居河代有不烈公七代
祖辨後魏侍中汾陰武侯六代祖謙中書令涪陵元公

英武忠肅魏書有傳曾祖範隋本州州都皇朝硤州刺史祖文度曹州刺史父元儉溧陽鄆二縣令光州司馬並政理清白見重於時公受天正性承家具美敦龐重樸負經濟大才優閒江海紫薇令姚公黃門監盧公特奏有學有文身材拔萃起家授洪洞尉刺史蕭瑗許以公輔之器羽林大將軍楊敬述持節河西以才略奏請充管記秩滿授江陽丞長史王易從李朝隱以公清正直攝江陽江都海陵三縣令中丞宇文融殿中侍御史

咸廩業並引為判官狀稱猾吏畏威而破膽羣萌飲惠
以息肩奏才學惟高公清特立公操斧則伐拂鐘無聲
淮海之間義風一變會有制命舉才高未達沈跡下寮
宏詞博識至公從正者上御紫宸殿親試親考入拜獻
替之司正議鯁詞多所獻納御史大夫李朝隱屢有推
薦竟有昇擢及公之出宰也以擅美對揚推能撫字將
化風俗且辭掖垣議者為屈公無愠色躬親庶務朝夕
勤勞寒者衣之饑者食之二十一年人尤困餒公輸出

私米兼賑官糧徙死得生百餘萬計勅使少保充公深
加器異當朝談獎狼暴出境鹿馴於邑廣開郵閤大創
厰倉南填巨坑北防深水太原尹王公以殊政奏長史
李植以異能上七年在任無風雨霜雹水旱蟲蝗之害
長史李公又考其孤清耿介冰碧在懷乃居於高平山
業公與秘書監賀知章中書侍郎嚴挺之虞部郎中褚
光為塵外之交嚴稱云難進易退翱翔宇宙之間廓然
不可得而見褚每云暗與道合神超造化賀之篇翰往

來精密公每讀古史及聞時說有一仁一義一忠一孝者未嘗不慷慨涕泣絕薰腥救窮急傲然獨得情智耿然君子稱之飄飄雲霄之氣磊磊棟梁之骨方將出地絡以遐邁超天衢而高視十七鄉父老崔亮臣郭全壁等五百餘人式刊善政季鶴作頌傳於終古詞曰我公分肅英徽粹河汾穆崇闡我公分深厥政嵇邦典活人命我公分豁虛受洞羣友垂大久

五臺山清涼寺碑

李 邕

上尊王之分護大千也甘露以灑之慈雲以覆之香風以熏之惠日以暖之忽恍乎無相之體周洞乎有形之類演正法降毒龍在清涼之山苑經行之地其山也左溟渤右孟津恒岳峙其前陰山屋其後五峰對聳四望崇崇蓄陰陽之變化含造化之竒特每至丹青出日俯拍雲霞清漢無波下看星月可以侔鷲嶺可以闢蓮宮在炎漢時卜中箭嶺用肇造我清涼寺在北齊時以八州租稅食我緇徒焉歷代帝王莫不崇飾洎我唐開元

天寶聖文神武應道皇帝丕宏妙教大闡玄宗渥澤浸
而恒河流景福烝而鐵山固仍復舊號祇以修建先是
長安年中勅國師德感供幡花文殊應見於代具大神
變法大光明儼兮似或存倏兮無處所凡稽首咸懷欣
澤傍顧此身盡在光影其畢棄咎乃罔不休示立諸相
而無所立廣度羣生而無所度非大聖至神覆護其孰
能如此者歟夫其清涼之為狀也壯矣麗矣高矣博矣
靡可得而詳矣赫奕奕而燭地崒巍巍而翊天寒暑隔

闕於簷楣雷風擊薄於軒牖星樓月殿憑林跨谷香窟
花堂枕峰臥嶺尊顏有睟像設無聲觀之者發惠而興
敬居之者應妙而合道天花覆地積雪交輝梵響乘虛
遠山相答珍木靈草仰施而紛榮神鐘異香降祥而聞
聽淒風烈烈詎辨冬春奔溜潺潺不知晨暮經所謂吉
祥之宅豈虛也哉開元二十有八載帝之元女曰永穆
公主銀漢炳靈瓊娥耀質發我上願歸乎大雄爰捨金
錢聿崇妙力奉為皇帝恭造淨土諸像欽鑄銅鐘一駢

之以七寶合之以三金影搖安樂之界聲震閭浮之國
足以滌除煩惱足以開鑿聾盲二沙門清白懷忠置陳
於禪林之院樹法幢以供之聲梵樂以安之惟時孟秋
月望慶雲出山西北圓光五百餘丈有萬菩薩同見其
間前後感應不遽數意者其福我聖君乎天寶七載貴
妃兄銀青光祿大夫弘農縣開國男上柱國鴻臚卿楊
銛奉為聖主寫一切經五千四十八卷般若四教天台
疏論二千卷俾鎮寺焉海墨樹筆竹紙花書密藏妙輪

千童萬品置之以寶案盛之以玉箱上祝祐於君親下
澤潤於黔庶善夫上座曇財寺主神慶都維那智詵入
妙覺海登大空山大德忠翰智空曇開如岍玉寶先覺
蓮花不染高僧清超淨法雲光庭觀谷陰禪杖巖棲戒
葉並鸞鳳比德龍象叶心豈即舊而增修亦維新而起
構備致靈應昭彰邑郡以為智德斯遺靡籌稱為句偈
不忘式圖刊勒敢承前矩強述斯文銘曰天作五山兮
實曰五臺臺上出泉兮有龍為災大聖煦嫗兮戢毒徘徊

徧西南其利兮赫赫枚枚翠微之上兮崒崖崔嵬金容
月滿兮寶座蓮開祈我聖皇兮其至矣哉以感以通兮
為祉為福前際後際兮無去無來



山西通志卷一百九十一